

**Naartunermi, erninermi meeravissartaarnermilu sulinngiffeqartarneq pillugu anaanaasut tamarmik sapaatip akunneranut akunnernik 40-nik erninerminnik, sapaatit akunnerini 19-ini, siornatigut suliffigisimasaq apeqqutaatinnagu ullormusiaqarnissaasa pisinnaatitaaffigilernissaannut, Inatsisartut inatsisaasa allangortinnissaanut Naalackersuisut peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Jens NapâtôK', Naleraq)

### **Akissuteqaat**

(Isumaginninnermut, Suliffeqarnermut, Ilaqutariinnut Nunamullu Namminermut Naalackersuisoq)

### **Aappassaaneerinnineq**

Naalackersuisut sinnerlugit Ilaqutariinnermut Peqqissutsimullu Ataatsimiititaliaq siunnersuummik sukumiisumik suliarinninnerannut aammalu isumaliutissiissummut tunngavissalimmut qujassuteqarfigaara.

Naalackersuisut maluginiarpaat ataatsimiititaliap erseqqissaraa ilaqutariit erninermut, qitornartaarnermut meeravissartaarnermullu atatillugu atugarisaat pillugit annertunerusumik ilisimasaqalernissaq pisariaqartoq, kiisalu inatsisitigut, aningaasaqarnikkut allaffissornikkullu allannguutaasinnaasunut kingunerisassat pillugit ilisimasaqarnerunissaq pisariaqartoq.

Naalackersuisut aamma maluginiarpaat ataatsimiititaliap kissaatigigaa misissuinermik taamaallaat suliaqartoqassanngitsoq, aaqqiissutaasinnaasunilli aalajangersimasunik saqqummiussisoqassasoq. Ataatsimiititaliaq siunnersuuteqarpoq erninermut atatillugu ullormusiat pillugit aaqqiissutaasinnaasunik minnerpaamik pingasunik saqqummiussisoqassasoq, taakkunanga minnerpaamik ataaseq saqqummiunneqassasoq ullormusianut minnerpaaffigitinneqartup qaffannissaanik takutitsisumik. Tamanna Inatsisartut politikikkut aalajangiinissaannut ersarinnerusumik paasissutissartalimmik tunngavissiissaaq.

Naalackersuisut ataatsimiititaliap allannguutissatut siunnersuutaa taperserpaat aammalu erninermut, qitornartaarnermut meeravissartaarnermullu atatillugu ilaqutariit atugaasa pitsaanerulersinneqarnissaat siunertaralugu aaqqiissutaasinnaasunik misissuinermik ineriartortitsinermillu suliaqarnerup ingerlaqqinnissaa qilanaaralugu.

Taamatut oqaaseqarlunga ataatsimiititaliap allannguutissatut siunnersuutaa Inatsisartunut suliassanngortippara.